

Bulić: Susret sa Sanom 7 je zagrijavanje za Krivaju!



Rukometaši tuzlanske Slobode drugi dio prvenstva u Prvoj federalnoj ligi – Sjever, otvaraju sutra u Mejdanu protiv ekipe Sana 7 iz Sanskog Mosta.



(Foto: Miroslav Petrović)

Trener Mirza Bulić kaže da očekuje rutinsku pobjedu, ali će od igrača tražiti maksimalni angažman kako bi se što bolje pripremili za naredni „duel svih duela“, protiv Krivaje u Zavidovićima.

– Na startu prvenstva u Sanskom Mostu pobijedili smo ubjedljivim rezultatom (47:26). Sada smo mnogo jači, tako da sutrašnja utakmica ne bi trebala donijeti ništa drugo sem naše pobjede izražene s velikom gol-razlikom. To je praktično zagrijavanje za Krivaju – kaže Bulić u razgovoru za Tuzla LIVE.

U narednom kolu Sloboda je slobodna, a onda u gostuje u Zavidovićima gdje će, najvjerovatnije, biti odlučeno ko će biti prvak lige i budući premijerligaš.

– Mi se nakon završetka prvog dijela sezone pripremamo isključivo za uzvrat s Krivajom. Oni su nas, zahvaljujući našim greškama, pobijedili u Tuzli (29:30), tako da im se sada moramo revanširati u gostima, ukoliko želimo da se radujemo na kraju prvenstva. Razloga za optimizam ima, jer smo sada mnogo jači nego u prvoj utakmici, za golmana Omerovića, te bekove Denju i Suhonjića – zaključio je Bulić.

Sutrašnja utakmica imat će i svečarski karakter, jer se „solari“ opraštaju od golmana Danijela Sablića, koji je preuzeo „kormilo“ ženskog rukometnog kluba Jedinstvo.

Utakmica Sloboda – Sana 7 igra se sutra u maloj dvorani Mejdana od 15 sati.(mp)

Date: 16-02-2019